

有一善者矣苟有善雖不及于吾何可不學也苟有不善雖賢于吾何可不改也詩曰伐柯伐柯其則不遠

必大畜乃言時君子無倖獲之理必无妄乃言災君子無倖免之術

行事之始當思其終接物之際宜戒其薄

問目

桐鄉張履祥念芝氏著

此余向所求教先師之冊也忽忽十餘年過失多於前時學問益負初心撫此徂光用深悲歎哲人既萎問業無門徒自惘惘沒齒而已

人不知學雖事親從兄即已不能何況其餘
立奮乎百世之心懷未免鄉人之耻
山陰劉先生批 可謂有志

為學必遵聖人之言猶醫家必照古方也舍此而學即是異學
言即是邪說行即是暴行



局量褊淺規模狹隘雖使自好未免爲鄉人也伊尹以天下爲已任明道以興起斯文爲已任吾人不立此志恐遂陷于流俗

妄感不可有自然之感不能無絕感守寂卽入于禪吾儒之學隨感而應應已仍寂如鐘在懸扣之則鳴如琴在御鼓之則聲良背行庭意或如此但此地位不易到得

劉先生批 正好下手

學問未論高下淺深先辨誠僞誠則青天白日此人夙夜寤寐亦是此人僞則大庭廣衆是一人暗室屋漏又是一人所謂譬諸小人其猶穿窬之盜也何可不謹

劉先生批 此卽所謂人鬼關也故慎獨工夫最爲喫緊

愈體驗愈見切實安樂與憂患一也而憂患爲易

習氣不脫難以言學辟如羈鳥在籜終不能翱翔于天地也

正已而不求于人是聖賢根柢處

以夫子爲之師顏淵爲之弟猶然博文約禮今以中人之才當初學之日遂云脫去支離直尋性道將恐入于邪道而不自知也

志趣高明廣大而後可以共學功力堅忍果決而後可與適道必有夜以繼日坐以待旦之精神而後可謂之學不然忽忽終年自貽伊戚而已

非禮勿視聽言動踐形工夫存乎此
恐懼者脩省之資脩省者恐懼之實

忿爭之中無正士門戶之內無忠臣

只自知不是一念便為改過之幾易之所以取于悔也只自知
戒懼一念即為遠害之門易之所以取于厲也

人先須趋向正趋向正則雖離師友自能有進趋向不正雖有
師保如臨父母不過在言行上把持得轉背便不是

未能守經輒言行權勢必為機變之巧無所用耻而已
九族不睦出于無德

程子曰人於夢寐時亦可以卜自家所學之淺深如夢寐顛倒

即是心志不定操存不固祥久不侍先生側兼多離索直諒

之言嚴切之教不能時時聞惟以此自鏡深省得失良為有
驗也

動於欲雖欲求靜而不可得也

志氣昏只繇於惰治惰莫如敬

雖行道濟時有必出于己之意此為驕吝亦為計功謀利已足

亂天下矣天下事在我當為則為之我不為則人為之夫何
私

劉先生批 直是勘得到

事當難處輒想古人每有難于我或相倍蓰或相什百或相千

萬者莫不處之裕如我何以不能則徃徃見其所不及而于處之之道亦思過半矣故詩曰我思古人實獲我心

讀史不徒考其成敗得失有思齊內省之志方爲尙友古人之實不然博學宏詞而已

爲學先求無欲其爲人也多欲雖從事于此終是要攘臂下車格例二字習以成風雖有賢者不能出此若欲太平自朝及野非盡破此二字其勢不能董子所謂譬之琴瑟不調甚必解而更張之也

其細已甚未有不速亡者國與家一而已

好善惡不善是意誠真好善惡不善是誠意好以善未嘗作好也惡以不善未嘗作惡也此之謂動而無動當其未有所好
好善之體未嘗不存也當其未有所惡惡不善之體未嘗不存也此之謂靜而無靜

劉先生批 此處實無動靜可分并無動靜之見可著

不特佻達是輕凡氣之易動皆是輕不特浮慢是粗凡爲物所蔽皆是粗繇于用工疎而定力淺

工夫放寬不得又急遽不得要震奮又要從容日月相推而明生焉寒暑相推而歲成焉於此可得自強不息之義

脩已治人莫大於禮樂愛敬者禮樂之本也

人於過失當時卽不能自知過後豈有不悔但不能乘此悔心

力圖自新他日臨事差忒如故韓子所謂當其在辱亦克知悔及其既寧終莫能戒如此終身所言所行只是有悔安得悔亡

劉先生批

數語最親切有味

子夏曰大德不踰閑小德出入可也玩其辭氣固有無已則可之意人便假此以爲口實以爲但要大處立些名節小處不必顧慮不知名節者事勢之偶然豈有期而立之之理平生百行草草假饒立得名節不過一時氣激所致非義理之本然下面都無可觀况如此之人到臨大節必然倉皇回惑鮮不至于潰裂者古人敬小慎微雖細必謹蓋以此也

劉先生批

此等氣習真個害世道不小

才高者左支右吾耳目儘是塗飾得來但不堪反觀耳譬諸小人其猶穿窬之盜正謂此也

劉先生批

戒之戒之省却許多勞攘

欲使善必出於己便是計功謀利之心總緣有我無我則廓然而大公矣

劉先生批

所以學莫大于求仁

天地中和之氣產爲君子乖戾之氣產爲小人世道盛則氣和氣和則賢才衆多故曰君子道長世道衰則氣戾氣戾則奸邪衆多故曰小人道長惟君子道長故得時用事者恒君子

凡富貴壽考之類多自君子得之而凶折刑戮之類每及於小人惟小人道長故得時用事者恒小人凡富貴壽考之類多于小人得之而凶折刑戮之類亦及於君子辟諸草木感陽氣而生者陽盡則衰感陰氣而生者陰盡則槁此固氣數之自然者也但陽氣終無滅息之理故聖人參贊化育唯是進君子退小人崇正學黜異端則不仁遠而暴亂寢政教行而治安久矣

劉先生批 世道盛衰繇吾輩主張

立身大節從目前見利思義見危授命久要不忘平生之言打算起古人所謂先立乎大所謂在天地間堂堂正正作一個人也於此打算不過難乎其為人矣

劉先生批 嚴哉

才者性之能事性有仁義禮智之良便自能惻隱羞惡辭讓是非程子所謂性無不善而有不善者才也是本氣而言孟子謂若夫爲不善非才之罪也是本理而言

否之世尙有三陽但在外耳至於剝之上九不獨在內者無有卽在外者亦漸滅殆盡所謂天地閉塞漸有人消物盡之象當其時亦便有一人從艱難成廢之餘動心忍性以爲來復之本此天地所留以圀造化者也故曰天地之心

劉先生批 此人最不易得

楊園先生全集
劉先生摠批 諸語多從自身體貼出來故不落語障所見已
是端的從此但莫生退轉心當自有欲罷不能之勢
又批 且恁地如此矻矻不舍自當長進去不必只管就舊
時行履較量進退也

備忘錄遺

桐鄉張履祥念芝氏著

自佛入中國從來爲禪學者不曾侵入聖人正道自張子韶改
頭換面以出便有雅鄭紫朱之亂至象山陽明則不復辨別
矣

事到處不去決當有一善處之方所謂術也又不入權詐一路
此非愚忠愚孝所能爲故曰德慧術知觀舜處父子兄弟之
間綽綽有餘

有從事於克己而不能復禮者未有禮復而已不克者故關中
之學以知禮爲先知禮則成性矣